

die ist die my mynt. **D**ie my mynt sal  
 ghemynt worden van mine vader  
 ende ick sal hem mynen en hem my  
 seluen openbaren. **D**oe seide hem iudas  
 niet die scharioth hiet. **H**ere wat ist  
 ghesecht dattu ons dy seluen wilt  
 openbaren niet der werlt. **J**esus ant  
 worde. **D**ie my mynt die sal my leri  
 ghe holden ende mijn vader sal hem  
 mynne en wy sullen toe hem coeme  
 en een woeninghe by hem maken.  
**D**ie my niet en mynt die en holt my  
 ne leringhe niet. **M**eer dat sermoen  
 dat ghy ghehoert hebt en is mine  
 niet meer mijns vaders die my ghe  
 sant heuet. **D**it hebbe ick v ghesecht  
 by u bliuende. **D**ie troester die hilli  
 ghe gheest den die vader senden sal  
 in minen name die sal v al dinck  
 leren ende sal u beduden al dat ick  
 u segghen sal. **M**ijnen vrede late ick  
 u. **M**ijnen vrede gheue ick u. **I**ck en